

# FURÚMIÑETU LIGÁRADAN APÓSTOLU JUAN

## Dimúrei le lánina ibágari

**1** <sup>1</sup>Wabúrrijaña jun luágu Búngiu Irájü lé buga njeinjalibei dan le lagúmeserunbei sun cátei. Ába liabin Búngiu Irájü ubouágun queísi ában güriá, aríja wamúti láu wágu, agáamba wameí ladímurejan. Aríja wamúti sun le ladúgübei, gurú wagía luágu láu wájabu. Ligía le ídaangiñebei liábin sun ibágari, ligía gíñe le gíríbei “Dimúrei”. <sup>2</sup>Ába liábin ubouágun, quei nubeíbei jun, aríja wamúti, geféen wagía luágu, áni guetó wabúrrijaña jun luágu. Níñein Búngiu Irájü lúma Búngiu Úguchili lúmagiñe furúmiñeti dan, ába liábin ubouágun queísi güriá lun gayáraabei lan wasúbudiruni. <sup>3</sup>Wafúraanguagüdüñein lubeíti jun le aríja wamáalibei ladúgün, lúma le agáamba wamáalibei laríñagun, lun gayáraabei lan jaffínerun le tímátimaati, lídan jumámuga ában wáma lídan cátei lébei, lídaañadünme gíñe ában lúma Búngiu Úguchili lúma Jesucrístu le Búngiu Irájü, queísi wagía. <sup>4</sup>Ítara lúba dayárubei lan wagúndan, sun wagía.

## Ítara líña Búngiu queísi lámpu

<sup>5</sup>Niján ugánu le larúfudajabei Crístu woun, le gíñe wíchugubei jun guetó. luágu ítara líña lan Búngiu queísi ában lámpu, mánti ni cáta lúma lubúriga. <sup>6</sup>Ánjawa aríñaga luágu lídaañadiwa lan ában lúma áni madúgün wamúti le laríñagubei, lídaañagidiwa lubúriga, áni weyéedaguña woúngua láu waríñagun luágu lídaañadiwa lan ában lúma, lugúndun múaran lan wagáburi lúma linárün. <sup>7</sup>Ánjein úaragua lubeí wagáburidun lúma linárün, lídaañadiwa larúgounga, áni inárüni luágu lídaañadiwa lan ában wámagua, áni chibá lumuti líta Jesucrístu sun wafígoun.

<sup>8</sup>Ánjawa aríñaga luágu mafígoun wamá, weyéedaguña woúngua, maríchati le waríñagubei. <sup>9</sup>Ánjein wagúfesera wafígoun, gayáraabei wemenigidun luágu Búngiu luágu ladúgübei lan le úaraguabei—ferúduna lubeí wafígoun, jarúmagüda lówame lídaangiñe sun wuríbani. <sup>10</sup>Ánjawa aríñaga luágu madúgüngidiwa lan figoú, wadúgüñein Búngiu camá yéeti, áni merésibirun wamágili lerérun tídan wanígi.

### Adímurejati Crístu lueígiñe wafúleisein ligíbugiñein Búngiu

**2** <sup>1</sup>Nirájüñü, nabúrüjañein buri cátei le jun lun mafígounjan jumá. Láu sun líra, ánjawa afígounja, ladímurejaba Wabúreme Jesucrístu lueígiñe wafúleisein ligíbugiñe Wáguchi Búngiu, ladúga ligía rügüñein richágua ligíbugiñe Búngiu. <sup>2</sup>Lídaangiñe Jesucrístu ferúdunawa lan wafígoun, áni mámarügü wafígoun, ferúdunawati gíñe jafígoun sun ja afíñebaña luágu.

<sup>3</sup>Ánjein wagúnfulira lugúmadin Búngiu, wasúbudirubei luágu chülújadiwa lan asúbudirei Búngiu. <sup>4</sup>Ánjein aríñaga ában gürígia. “Subúdi numúti Búngiu”, áni magúnfulirunti táu lugúmadin, yéeti gürígia ligía, ibídiñegili Búngiu lun. <sup>5</sup>Ánjeinti gürígia le adügübalin le lubeíbei Búngiu, chülújali Búngiu ínsiñeda lun buídu buídu, ítara líña wasúbudiruni luágu lídaañadiwa lan ában lúma. <sup>6</sup>Le aríñaguti luágu lídaañein lan ában lúma Búngiu, lúnti labágaridun queí meja labágaridun Jesucrístu ya uboúagu.

### Le iséri gumádi

<sup>7</sup>Nidújeñu, mámatia iséri gumádi le nabúrüjabei jun, ligía méme binádu gumádi le júmabei lúmagiñe dan le jagáambubalin ugánu luáguti Crístu, lun jagáburidun úaragua lúma ugánu ligía. <sup>8</sup>Guetó narítaguagüdüñadiñ luágu gumádi le lagúarubei Jesucrístu iséri gumádi, áni gumádi ligía, lun jínsiñegua wamá woúniwagua. Ítara líñá meja labágaridun Jesucrístu, jabágariduña gíñe ítara lugúndun jeíbuguña lan lídan larúgounga le linárünbei Búngiu, mámaañadiñ lídan lubúriga.

<sup>9</sup>Le aríñaguti luágu leíbuguña lan lídan larúgounga áni iyéreeguti lidúje lun, lídaangili lubúriga, ibídiñegili Crístu lun. <sup>10</sup>Le jínsiñejabuti joun lidújeñu lueígiñe Jesucrístu, lídaañein larúgounga, subúdi Crístu lun, áni úati ni cáta lun láburugüdüni lídoun figoú. <sup>11</sup>Ánjeinti le iyéreejabuti lun lidúje, ítara líña queísi gürígia le eíbugubei lídan lubúriga, ibídiñeti lun jalíñounbei lan lugúndun darú lani lubúriga laríjin.

<sup>12</sup>Nirájüñü, nabúrüjaña jun lugúndun ferúduna láali Búngiu jifígoun ladúga Crístu. <sup>13</sup>Agúbürigu, nabúrüjaña jun lugúndun subúdi jumáli lan Jesucrístu lé meja njeinjalíbei lúmagiñe furúmiñeti dan. Núbürigiña, nabúrüjaña jun lugúndun gáñei jumáli lan wuríbu luágu Máfia.

Nabúrüjanbei jun, nirájüñü, lugúndun subúdi jumáli lan Búngiu Úguchili. <sup>14</sup>Nabúrüjaña jun, agúbürigu, lugúndun subúdi jumáli lan Jesucrístu lé meja njeinjalíbei lúmagiñe furúmiñeti dan. Nabúrüjanbei jun, núbürigiña, lugúndun jere jumá, áni resíbi jumáli lerérun Búngiu tídan janígi, lugúndun gíñe gáñei jumáli lan wuríbu luágu Máfia.

<sup>15</sup>Mínsiñedalá ligáburi uboú jun, ní buri cátei le lánina uboú. Siñáti lajínsiñedun cátei lánina uboú jun, jínsiñeme Búngiu jun, <sup>16</sup>lugúndun úati ni cáta lídaangiñe cátei le líchugubei uboú núbinti lúmagiñe Búngiu, lúmagiñe guánarügü uboú líabin. Luríban jayúmajan gürígia, ayúmajani

lan jabíjini cátei le jaríjibei le uágubei jarítagua luágu buídu lan, lúma pántaü luágu cátei le jabíjibei, ligía buri cátei le líchugubei uboú. <sup>17</sup>Áni uboú, agúmucheina líña láu buri sun luríban ayúmajani le lídaanbei, ánjeinti le adúgüti lugúndan Búngiu, labágariduba lun sun dan.

### Inárüni lúma iyéeni

<sup>18</sup>Nirájüñü, chülíjiali lagúmujoün dan. Agáambaadün luágu íníte lan Lágani Crístu, quei chülíguaaña lubeí sarágu láganiñu Crístu guetó, ligía wasúbudirunbalin luágu lagúmujoünjali lán buri dan le. <sup>19</sup>Wádaangiñe jáfurida, láu sun, lídan lan linárün cátei máma meja wánigu jagía, lugúndun lun jamúga meja wánigu jamá, jeréderuña jamúga meja wáma. Jíchugunbalin janágan luágu Crístu ítara lun laríjñiwa furáangu luágu máma lan wánigu le tímatimaati.

<sup>20</sup>Ánjeinti jugúya, rúlaali Crístu Sífiri Sándu jun, áni subúditün sun jugúya lun. <sup>21</sup>Nabúrújanbei lubeíti jun, lugúndun subúdi jumáni inárüni lánina wasálbarun, máma lugúndun ibídiñe lan jun, áni subúdi jumúti luágu siñá lan liábin ni murúsun arúfudajani múaraanti lídaangiñe inárüni.

<sup>22</sup>Ja arúfudajabalin le múaraanbei, ja aríñagubaña luágu máma lan Jesúsu Crístubei le loúnajabei Búngiu uboúagun lun lasálbaruniña gürígia, jagía láganibaña Crístu, mafñetiña ni luágu Búngiu Úguchili, ni luágu Búngiu Irájü. <sup>23</sup>Sun ja májabaña lun jasúbudiruni Jesúsu queísi Búngiu Irájü, ibídiñegili Búngiu Úguchili joun, ja aríñagubaña luágu Jesúsu lan Búngiu Irájü, subúdi gñe Búngiu Úguchili joun.

<sup>24</sup>Ligía, areída jumeí lubeí ugánu le jagáambubei lúmagiñe furúmiñeti, tídan janígi. Ánjein jadúga ítara, jeréderuba gñe lídan ában lúma Búngiu Irájü lúma lúma Búngiu Úguchili, <sup>25</sup>jerésibiruba gñe ibágarí le magúmchaditi, queísi laríñaguni Jesúsu woun. <sup>26</sup>Ligía nerérunbei jun jawágu láganiñu Crístu jagía já yebe busénbaña jayéedagunün. <sup>27</sup>Níjein Sífiri Sándu júma le líchugubei Crístu jun, memégeiruntün lubeíti ámu lun larúfudajan jun luágu linárün Búngiu, lugúndun arúfudaja lumúti Sífiri Sándu sun cátei jun, áni inárüni larúfudajabei, máma iyéeni.

<sup>28</sup>Ítara líña lubeíti, nirájüñü, ítara méme jumá lídan ában lúma Crístu lun dánme lan le liábin, gayára lámuga wasúbudiruni luágu buídu wamá lúma, úa lámuga busíganu wawágu ligíbugiñe. <sup>29</sup>Queísi subúdi jumáni luágu richágua lan Crístu lídan sun cátei, lúnti gñe jasúbudiruni luágu lirájüñü lan Búngiu sun ja richáguabaña ligíbugiñe.

### Lirájüñü Búngiu

**3** <sup>1</sup>Aríja jumá luweírin wínsiñe lun Búngiu Úguchili, darí lun gayára lan lagúarúniwa woun “lirájüñü Búngiu”, áni inárüni luágu lirájüñü wamá. Ligía siñá jabáliwa lánigu uboú gunfaráanda lugúndun ibídiñetí meja Jesucrístu joun lídan linárün cátei dán meja le ya lan uboúagu. <sup>2</sup>Nidújeñu jínsiñetiña nun, lirájüñüjadíwa Búngiu guetó, áni

marúfudúngili woun cátabadiwa lan lídaanme lagúmujoún, subúdirügü wamúti luágu dánme lan le lagíribudun Crístu, ítara wába lan quei ligía, lugúndun waríjubei ítara quei lubeí. <sup>3</sup>Áni sun le agúrababajálin buri cátei le, jarúmagúda lumúti ligáburí ítara quei jarúma lan ligáburí Crístu.

<sup>4</sup>Ánjeinti sun le afígounjabei, dūrúgua lumúti lilúrudun Búngiu, lugúndun luágu cátei figoúbei ladúraawagún lilúrudun Búngiu. <sup>5</sup>Subúdi jumáali luágu lun lan lagídaruni Jesucrístu wafígoun liábin uboúagun, luágu gíñe úa lan ni murúsun figoú luágu. <sup>6</sup>Sun lubeíti le lídaanbei ában lúma, máma lídaañein figoú, áni sun le lídaanbei figoú, marijin lágili Jesucrístu, masúbudirun lágili gíñe. <sup>7</sup>Nirájüñü, mayéedawagua jumá, ában gürigia richáguati ligíbugiñe Búngiu adúga lumúti le richábei, queísi richágua lan Jesucrístu. <sup>8</sup>Ánjeinti le eíbugubei lídan figoú, lánigu Máfia, lugúndun afígoujati Máfia lúmagiñe furúmiñeti dan, ába liábin Liraú Búngiu lun lagúnrinchaguni luwádigimari Máfia.

<sup>9</sup>Úati ni ában le liraúti Búngiu asígiruti lídan figoú, lugúndun níjein ibágari le líchugubei Búngiu lun lídan, siñáti lasígirun lídan figoú lugúndun liraú lan Búngiu. <sup>10</sup>Subúdiwati cátaña lan lirájüñübaña Búngiu lúma cátaña lan lirájüñübaña Máfia, lugúndun furúmieguarügü le madúgünbalin le buídubei, o mínsiñejabu lan lun lidúje lueígiñe Jesucrístu, máma lánigu Búngiu.

### Jínsiñe jamá wíbirigu woun

<sup>11</sup>Niján ugánu le jagáambubei lúmagiñe furúmiñeti dan. lun jínsiñegua wamá wámagua. <sup>12</sup>Moún lumuti ítara wamá quei Caín, lé meja lánigubei Máfia, ába láfaruni lamúlen. ¿Cági ueígiñe láfarei? Lugúndun wuríba lán meja le ladúgübei Caín, áni buíti le ladúgübei lamúlen, ligía lagímugajanbei.

<sup>13</sup>Nidújeñu, mawefíridalá janígi ánjaün eyéreeguda joun lánigu uboú. <sup>14</sup>Wagía, ítara wáña meja queísi jiláaña, guetó ibíjaadiwa ibágari magúmuchaditi, áni subúdi wamúti líra lugúndun jínsiñetiña wadújeñu lueígiñe Jesucrístu woun. Le mínsiñejabuti lun lidúje, jiláñu mémegili. <sup>15</sup>Sun le iyéreejabubei lun libíri, gáfarajati, áni subúdi jumúti luágu úa lan ni ában gáfarajati lun gayára lan gabágari lan le magúmuchaditi. <sup>16</sup>Subúdi wamúti cátei lan ísiñenibei. luágu líchuguni Jesucrístu libágari wawágu. Lúnti giñéti wánjarun lun wíchuguni wabágari jawágu wíbirigu. <sup>17</sup>Ánjein níjein lubeí lúma ában gürigia lun lawínwandun, áni laríja luágu níjein lan lemégeirun lidúje áni míderagun lumúti, ¿da lubági níjein lan ínsiñeni tídan lanígi lun Búngiu? <sup>18</sup>Nirájüñü, moún lumuti wayumárurügü lan wínsiñejabu, lúnti ában lan ínsiñejabuni le gumúti, lun laríjin lídan cátei le wadúgübei.

### Eménigini ligíbugiñe Búngiu

<sup>19</sup>Ánjawa jínsiñejabu le gumúti, gayáraabei wasúbudiruni luágu lánina wamá affíneni le inárüntibei, gayáraabei gíñe wasúbudiruni luágu buídu lan

weréderun ligíbugiñe Búngiu. <sup>20</sup>Ánjoun jamúga íchiga wanígi dúru wawágu luágu som cátei, subúditimaati luáguti dúru ligía lun Búngiu, lugúndun subúdi lan sun cátei lun. <sup>21</sup>Ánjoun madárirun wanígi dúru wawágu, nidújeñu, gayáraabei wayábin ligíbugiñe Búngiu láu weménigi luágu, <sup>22</sup>luágu líchugubei lan sun le wamúriajabei lúma woun, lugúndun gúnfuljadiwa láu lugúmadin áni adúga wamáali le áubei lagúndaara. <sup>23</sup>Lugúmadin Búngiu, lun wafíñerun luágu Jesucrístu le Liraú, lun gíñe jínsiñegua wamá wámagua queísi meja laríñaguni Jesúsú woun. <sup>24</sup>Ja agúnfulirubaña láu lugúmadin Búngiu agánawatiña lídan Búngiu, agánawa ligía Búngiu jádan. Subúdi wamúti luágu agánawa lan wádan luágu Sífiri Sándu le rúlaalíbei woun.

### Láni Búngiu Espíritu lúma láni lágani Crístu espíritu

**4** <sup>1</sup>Nidújeñu jínsiñetiña nun, maffínera jumá joun sun ja aríñagubaña luágu Búngiu lan adímurejabei jayúmulugugiñe, jóucha jumáña lun jaríjini ánjein Sífiri Sándu lubeí le jádaanbei o máma lan ligía. Lugúndun labuñchuña ubouú jáu yéetiña ja aríñagubaña luágu Búngiu lan adímurejabei jayúmulugugiñe áni jayéeni. <sup>2</sup>Láu igáburi le, gayáraati jasúbudiruni le gámabalin Sífiri Sándu. sun le aríñaguti luágu quei lan gürígia le tímatimaati liábin Crístu ubouúagun, njein Sífiri Sándu lídan áni láu lubáfu Sífiri Sándu ladímureja. <sup>3</sup>Ánjeinti le aríñaguti luágu iyéeni lan, luágu mayábin lan Crístu ubouúagun queísi gürígia, úati Sífiri Sándu lídan, espíritu le láganibei Crístu, ligía espíritu le lídaanbei gürígia ligía. Agáambaadün luágu liábinba lan espíritu ligía, njeinjali ubouúagu.

<sup>4</sup>Nirájüñü, lánigu Búngiu jugúya, gáñei jumáña yéetiña jagía ja busénbaña jagáraguagüdünün lueí arúfudajani le inárüntibei, gáñei jumáña lugúndun gabáfutimaati Sífiri Sándu le jádaanbei sügú láu láni Máfia espíritu le jádaanbei. <sup>5</sup>Lánigu ubouú jagía, lánina ubouú cátei le jarúfudajabei, ligía lébubei jagáambuniña ja gíñe lánigubaña ubouú. <sup>6</sup>Ánjein wagía, lánigu Búngiu wagía. Le subúdíjabebei lun Búngiu, agáamba lumútiwa, le mámabei lánigu Búngiu, májati lagáambuníwa. Ítara líña lubeíti gayáraati wasúbudiruni cátaña lan erésibirubalin lináriün Búngiu lúmoun cátaña lan erésibirubalin iyéeni.

### Ligáburi Búngiu lun larúfuduni ínsiñejabuni

<sup>7</sup>Nidújeñu jínsiñetiña nun, lúnti jínsiñegua wamá wámagua lugúndun lúmagiñe Búngiu liábin ínsiñejabuni. Sun le jínsiñejabebei, liraú Búngiu, áni subúdi gíñe Búngiu lun. <sup>8</sup>Le mínsiñejabuti, ibídiñegili Búngiu lun, lugúndun ligáburi Búngiu lun larúfuduni ínsiñejabuni. <sup>9</sup>Arúfuda lumúti Búngiu wínsiñe lun láu loúnajani Liraú le ábanrügüti ubouúagun lun loúnwen, lun gabágari wamá lídaangiñe. <sup>10</sup>Niján ínsiñenibei. máma luágu wagía lan jínsiñejabebei lun Búngiu, luágu ligía lan jínsiñejabebei woun, ába loúnajani Liraú le ábanrügüti lun loúnwen, lun lébuname ferúduawa lan wafígoun.

<sup>11</sup>Nidújeñu jínsiñetiña nun, ánjein jínsiñeediwa lubeí lun Búngiu ítara, lúnti gíñe jínsiñegua wamá wámagua. <sup>12</sup>Úagili ni ában arjíti Búngiu,

láu sun líra, ánjawa jínsiñegua wámagua, níjein Búngiu wádan, áni ítara líña warúfuduni wínsiñejabu le gumúti lun Búngiu láu wínsiñejabu wámagua buídu. <sup>13</sup>Rúlaali Búngiu Sífiri Sándu woun lun lachoururun luágu lídaañadiwa lan, áni wádaañein lan gíñe. <sup>14</sup>Wagía guánarügü aríja wamáali Liraú Búngiu, aríñaga wameí luágu lun lan lasálbaruníwa loúnajei Búngiu ubouágun. <sup>15</sup>Furúmieguarügü le afñerubei luágu Liraú lan Búngiu Jesúsu, labágariduña lídan Búngiu, áni labágariduña gíñe Búngiu lídan.

<sup>16</sup>Ítara líña wayábin asúbudirei lúma afñera luágu jínsiñe wamá lun Búngiu. Ligáburi Búngiu lun larúfuduni ínsiñejabuni, le abágariduti lídan ínsiñejabuni, labágariduña lídan Búngiu, áni labágariduña gíñe Búngiu lídan. <sup>17</sup>Ítara líña wayábin lun jínsiñe lan Búngiu woun le gumúti, ábame manúfude wamá lídaanme wéyu le lúnbei lagúseragüdüniña Búngiu sun gürígia ladúga wagáburiduña lan ya ubouágu queísi Jesucrístu. <sup>18</sup>Ánjein jínsiñe Búngiu woun le gumúti, manúfudebadíwa luágu le lúnbei ladügüni woun, láu luweírín línsiñe Búngiu woun, gidáti sun anúfudei waweí. Ánjein janúfude wabeí lueí Búngiu, ladúga wagúrabaña lan láburujan ligáñi wawágun. Ligía, ánjein janúfude lubeí ában gürígia, machülügilirügü líña Búngiu ínsiñeda lun le tímatimaati.

<sup>19</sup>Wagía, jínsiñeti Búngiu woun lugúndun wínsiñedun lun furúmiñe. <sup>20</sup>Ánjein aríñaga ában gürígia. “Jínsiñeti Búngiu nun”, áni mínsiñeti libíri lun, yéeti gürígia ligía, lugúndun ánjein mínsiñe libíri ában gürígia lun, le aríja lumúti, siñábei gíñe jínsiñe lan Búngiu lun, le maríjin lubeí. <sup>21</sup>Rúlaali Crístu gumádi le woun. le jínsiñejabuti lun Búngiu, lúnti gíñe jínsiñe lan libíri lun.

### Wagáñeiruni wuríbu lúma ubou

**5** <sup>1</sup>Sun ja afñebaña luágu Jesúsu lan Crístubei le loúnajabei Búngiu, jagía lirájüñübaña Búngiu, áni sun ja jínsiñejabubaña lun Wáguchi Búngiu jínsiñejabubaña gíñe joun lirájüñü Wáguchi Búngiu. <sup>2</sup>Subúdi wamúti luágu dan lan le jínsiñe lan Búngiu woun áni adúga wameí le lubeíbei, jínsiñe jamá gíñe lirájüñü Búngiu woun. <sup>3</sup>Ladügüniwa le lubeíbei Búngiu, ligía ínsiñejabunibei lun, áni majúrüti lugúmadin, <sup>4</sup>lugúndun sun le liraúbei Búngiu, mabáfuti cátei lánina ubou luágu. Wafíñen, ligía cátei le íchigubei ubáfu woun lun wagáñeirun luágu cátei lánina ubou. <sup>5</sup>Le afñebei luágu Jesúsu lan Liraúbei Búngiu, ligía rügüñein gayára lagáñeirun luágu cátei lánina ubou.

### Geféenwa lan luágu Liraú Búngiu

<sup>6</sup>Jesucrístu ligía nübinbei láu bián seíni luágu ligía lan Liraúbei Búngiu. bián seíni ligía, dúna le lánina labásterun, lúma jítaü le lánina loúnwen. Mámarrügü láu dúna, láu dúna lúma jítaü. Áni Sífiri Sándu guánarügü geféenti luágu cátei le, ligía arúfudubalin sun inárüni woun. <sup>7</sup>Añájein úriüwa geféentiña luágu cátei le siélu. Búngiu Úguchili, Búngiu Irájü, lúma Búngiu Sífiri Sándu, áni ában méme jagía,

<sup>8</sup>níjein gíne úruíwa cátei geféenti múarugu luágu Jesúsu lan Liraúbei Búngiu. Sífiri Sándu, dúna le lánina labásterun Jesúsu, lúma jítaü le lánina loúnwen. <sup>9</sup>Resíbi wamúti le jarínagubei wügúriña, gúbuméti lúnti lan werésibiruni le larínagubei Búngiu guánarügü luágu Liraú lan Jesucristu. <sup>10</sup>Le affíneti luágu cátei le, choúru lumúti tídan lanígi luágu inárüni lan, le maffínebei, adúga lumúti Búngiu camá yéeti, lugúndun maffínen lan luágu le larínagubei Búngiu luágu Liraú. <sup>11</sup>Le larínagubei Búngiu, luágu rújali lan ibágari magúmuchaditi woun, áni lídaangiñe lan Liraú liábin ibágari ligía. <sup>12</sup>Le níjeinbei Liraú Búngiu lúma, níjein gíne ibágari le lúma, ánjeinti le úabei Liraú Búngiu lúma, úati gíne ibágari le lúma.

### Lagúmujuún buri lerérun Juan tídan gárada to

<sup>13</sup>Nabúrújañein cátei le jun, jugúya le affínebei luágu Liraú Búngiu, lun jasúbudiruni luágu gabágari jumá le magúmuchaditi.

<sup>14</sup>Jeménigitiwa luágu Búngiu, lugúndun subúdi wamúti luágu ánjava lan amúriaja furúmiegurügü cátei queísi labúseerun, lagáambubadiwa. <sup>15</sup>Áni ítara quei wasúbudiruni luágu agáamba láni Búngiu wayúmuragun, subúdi wamúti gíne luágu loúnabubadiwa lan.

<sup>16</sup>Ánjein aríja ában gürígia luágu ladügüña lan ában libíri ában figoú le mámabei lúnti lanúgüni lídoun féridi lun sun dan, lúnti layúmuragun lun Búngiu, ábame líchugun Búngiu ibágari lun gürígia ligía. Níjein figoú anúgüti gürígia lídoun féridi magúmuchaditi, málali lun layúmurawagúniwa lun Búngiu luágu figoú ligía. <sup>17</sup>Sun wuríbani figoú, máma sun figoú lun lanúgüni gürígia lídoun féridi magúmuchaditi.

<sup>18</sup>Subúdi wamúti luágu gürígia lan le anúgübalin Búngiu queísi Lúguchi, meíbugunti lídan figoú, lugúndun toúnigi lumúti Liraú Búngiu, siñáti ladügün Máfia ni cáta lun.

<sup>19</sup>Subúdi wamúti luágu lánigu wamá Búngiu, luágu lábugiñeñanu lan lubáfu Máfia sun ja lánigubaña uboú.

<sup>20</sup>Subúdi wamúti gíne luágu ñúbinjali lan Liraú Búngiu uboúagun, áni rújali lan gunfaráandaü woun lun wasúbudiruni Búngiu le tímatimaati. Wabágariduña le tímatimaati lídan ában lúma Búngiu, queísi lídaañadiwa lan ában lúma Liraú, le Jesucristubei. Ligía Búngiubei le tímatimaati, ligía gíne le íchugubei ibágari le magúmuchaditi woun. <sup>21</sup>Nirájüñü, mafálara jumáña búngiugu ja mámabaña Búngiu. Ítaralá.